

ai 12 di Avrîl 2026
di AQUILEE a GLEMONE

FURL-RUN

la corse pal furlan



CE ISE LA FURL-RUN ?

La “**FURL-RUN la corse pal Furlan**” e je la prime corse dedicate ai paîs, ae int, ae culture e ae lenghe dal Friûl.

E je une manifestazion populâr di musiche e fieste, e la sô prime, inedite edizion e partirà chest an in date ai **12 di Avrîl dal 2026!**

La corse e tacarà aes **6:00** di buinore de Basiliche di Aquilee e e larà dilunc par **120km** fin a **Glemone**, dulà che la rivade e je previodude pes oris **18:00**.

La **FURL-RUN** si disviluparà passant **26 Comuns** dal **Friûl** che a fasin part de **ACLIF** (*Assemblee de Comunitât Linguistiche Furlane*).

Intes placis principâls di ogni Comun i acompagnadôrs uficiâi “**I FURLANS A MANETE**” e “**I SBANDIERADÔRS LEON CORONATO DI SPILIMBERC**” dilunc dal passaç de corse, a saran protagoniscj di moments di fieste, musiche e ligrie adun cu lis comunitâts dai paîs!

Dilunc di ducj i 120km de manifestazion:

- il corteu al varà denant un furgon e dai motociclis che a garantiran la sigurece e il passaç intai ponts nevalgjics dal percors;
- il corteu al varà daûr une **ambulance** che e sierarà il grup e e garantirà sicurece e eventuâl socors ai participants.

La corse e larà indenant a un pas di **6 minûts al chilometri** par ducj i **120km**, garantint un ritmi e une velocitât acessibile ancje a chei mancual alenâts!

Al sarà previodût un grup costant di coridôrs che a fasin part di grups podistics regionâi, che al vuidarà il corteu puartant il strisson “**FURL- RUN la corse pal furlan**”.

Sul furgon denant il corteu, al sarà un **DJ/vocalist** che al varà l'unic compit di fâurs divertî e gjoldi il miôr pusibil il paisaç straordenari dai borcs dal Friûl!

In struc, la  e je:

- **NO competitive**: e je une corse popolâr, no une gare;
- **VIERTE A DUCJ**: ancje al mont de disabilitât (chist an no a lis bicicletis);
- **SIGURE**: dutis lis normis di sigurece a son stadis previodudis e a saran respetadis second lis normis di leç;
- **GRATUITE**: no coste assolutamente nuje, no covente nissune regjstrazion: unissiti e côr cun nô!
- **LIBARE**: si pues jentrâ di cualsisedi part dal percors e saltâ fûr in cualsisedi moment, si pues cori tant e trop che si vûl;
- **GAUDIOSE**: dilunc di ducj i 120km il corteu al varà denant un DJ/vocalist che al mantignarà un ritmi di fieste e ligrie;
- **ORARIE**: e tacarà aes 6:00 di buinore di Aquilee e e rivarà aes 18:00 a Glemone;
- **FURLANE**: vlstissiti cemût che ti va miôr, ma se tu vuelis, puarte cun te une bandiere dal Friûl o alc leât ae nestre tiere, al coventarà in cualchi mût a promovile;
- **UNICHE**: tant che il maraveôs teritori che e travierse!

Duncje: **prepariti**, la corse e sta spietant dome **te**!

IL TESTEMONI

La "FURL-RUN la corse pal furlan" e varà tant che protagonist un cjossul particolâr: un **testemoni**.

Cence volê fâ spiei azardâts, la idee dal testemoni e sarà simile a chê de fogule olimpiche.



Dulinvie de corse, e sarà une persone che e puartarà il testemoni cun la acuile e la bandiere dal **Friûl**: un simbul di **ricognossince**, di **promozion** e **vicinanze** ae nestre maraveose tiere!

Il testemoni nol puartarà dome la nestre bandiere: dentri al sarà presint un test, un **manuscrit** pensât di trê inteletuâi furlans che al contignarà un messaç pe **culture**, il **popul** e la **lenghe furlane**.

Il test al vignarà let ae rivade de corse a Glemone.

La idee e je che cui cal puarte il testemoni, si fâs puartadôr de **savietât** de nestre tiere, si fâs puartevôs ideâl de nestre **identitât** furlane.

Il testemoni nol sarà puartât di une persone sole, ma al passarà di une man in chê altre, tignint dongje lis nestris individualitâts intune uniche comunitât che e condivîl l'amôr par cheste tiere.

Par chest, il testemoni al sarà assegnât ogni km a une persone diferente; 26km a son bielzà assegnâts ae 26 aministrazions dai 26 Comuns che a saran traviersâts de corse: ma chei altris 94km a son ancjemò ducj di assegnâ!